



**ALOKUSAUN SUA EXELÊNSIA PRIMEIRU-MINISTRU
KAY RALA XANANA GUSMÃO NIAN
IHA OKAZIAUN LANSAMENTU PORTÁL ON-LINE
GOVERNUN NIAN**

Otél Timór, Díli

30 Marsu 2010

Exelênsias

Ilustres konvidadus

Senhoras no Senhores,

Ksolok boot ida mai ha'u, tanba ohin, bele mai iha lansamentu ofisiál Portál Governu nian ne'e, ne'ebé sei lori Timor-Leste no nia instituisoens hotu, bá besik liután timór-oan sira no mundu tomak.

Ohin halo semana ida, mak Konseihu Ministrus aprova Política Nasionál kona-ba Komunikaun Sosiál, instrumentu ida ne'ebé sei lori informasaun bá besik liután populaun tomak, hodi bele hetan asesu, ne'ebé valoriza meius komunikaun sosial nasional, no mós atu buka hadi'a profesionalizasaun i formasaun ba jornalistas sira.

Ho sentidu ida ne'e, mak mosu Portál Governu nian ne'e, ne'ebé dezenvolve kleur ona, maibé foin agora mak bele loke ba públiku, perante ilustres konvidadus sira hotu, i tanba ne'e mak ha'u agradese ba Ita Boot sira nia partisipasaun.

Ha'u konsidera katak Portál ida ne'e, mai preenxe lakuna ne'ebé iha hela kona-ba kontaktu diretu ho populaun i ho comunidade internasionál, hodi kumpri objetivus sívikus, kulturais no pedagójikus, liuhusi utilizaun teknolojias informasaun.

Hahú ohin, bele ona hetan informasaun liután, transparênsia, no sidadania ne'ebé di'ak liu, ho de'it hanehan butaun ida!

Senhoras no Senhores,

Iha demokrasia nia laran mak ita fiar katak bele iha instrumentus interasaun ho Sosiedade Sivil, fiar katak Povu bele hetan informasaun no mós bele informa hikas instituisoens sira, tantu públikas no polítikas. Portál ida ne'e, hanesan duni kanál privilejiadu ida atu instituisoens tomak, liu-liu governu nian, bele besik liután ba sidadauns no sosiedade tomak.

Hein mós katak Potál ida ne'e bele sai hanesan fatin referênsia di'ak ida, ba ema hotu ne'ebé hakarak mai investe iha Timor-Leste, tanba sira bele hetan nafatin informasoens atualizadas kona-ba asuntos nasionais, husi aspetu sosiál, ekonómiku, finanseiru i lejislativu.

Iha mós ambisaun atu sai hanesan naroman ida ba ita nia potenciál turístiku, hodi dada vizitantes no turistas sira mai; ambisaun mós atu sai hanesan arkivu interativu ida, ne'ebé bele koalia kona-

ba ita nia istória i kultura; ambisaun atu sai hanesan fonte informasaun atuál i dinâmika ida ba jornalistas nasionais no internasionais sira.

Senhoras no Senhores,

Portál ida ne'e sai nu'udar sinál signifikativu tebes, hatudu katak Timor-Leste tuir daudauk dalan dezvoltimentu no modernidade, katak: inovasaun.

Governu ida ne'e, dezde uluk kedas, hatudu atitude ne'ebé pozitiva tebes kona-ba inovasaun no mudansa. Ita konsidera katak sistema

komunikasaun ne'ebé abertu, transparente, asesível i inovadór, hanesan Portál Governu nian ne'e, sei la fó fatin ba monopolizasaun poder no la fó fatin ba intolerânsia política.

Iha kontextu transformasaun ida ne'e, mak ohin, ita hotu mai iha ne'e, mai lansa Portál ida ne'e. Hato'o informasaun no kaer ukun iha iha abertura i transparênsia nia laran, hodi hakat liu barreiras políticas, sosiais no jeográfikas, sei hametin liután ita nia demokrasia, no prezerva imajen Estadu Timór-nian.

Ita hakarak katak, ho governasaun ida ne'ebé nakloke i dinâmika liután, ita bele alkansa ita nia objetivus prinsipais hanesan, dezvoltimentu sustentável ho redusaun probreza, hodi dudu Sociedade Sivíl, Setór Privadu no atores dezvoltimentu sira seluk, atu partisipa di'ak liután iha prosesu ida ne'e.

Tanba ne'e, mak ha'u hakarak rejista ho laran kontente, servisu tomak ne'ebé to'o oras ne'e hala'o, hodi kria Portál "on-line" ida ne'e, no agradese liu-liu ba Sekretáriu Estadu Konselhu Ministrus nian, tanba nia diriji projetu ida ne'e ho di'ak duni, maski hasoru obstákulus no dezafius barak.

Ita hotu hatene katak, wainhira iha vontade, perseveransa no direasaun, ita consege duni implementa projetus inovadores ba ita nia Rain.

Maibé, servisu ne'ebé todan liu, foin agora mak atu komesa...Susesu Portál ida ne'e nian, depende maka'as tebes ba kapasidade halo manutensaun ba nia konteúdu tomak, husi ekipa ida ne'ebé forma ona

iha Sekretaria Estadu Konselhu Ministrus no sei depende ba koordenaun di'ak entre Ministérius, Sekretarias Estadu i Instituisoens Públikas sira seluk.

Nune'e mós, opsaun atu uza lian tolu, nasionais rua: portugêz ho tétun no língua trabalhu ida, hanesan Inglês – halo dezafiu ne'e sai todan liután, maibé sei la kole leet ida. Tanba ita hatene katak ita fó daudauk informasaun ba ema hotu, i la iha eksluzaun.

Senhoras no senhores,

Ikus liu, i molok ita atu pasa ba apresentasaun Portál Governu nian ne'e, ha'u hakarak felisita ezeutores projetu ida ne'e nian, hanesan IDA; felisita mós ekipa Sekretaria Estadu Konselhu Ministrus nian no ema hotu ne'ebé kontribui ba iniciativa ida ne'e, hodi nune'e, projetu ambisiozu ida ne'e, bele sai realidade.

Maibé kapasidade ne'ebé hatudu ona to'o ohin loron, sei la husik ita deskansa. Ezije nafatin ba ita hotu, dedikasaun ne'ebé boot tebes.

Atu Portál ida ne'e, bele hateke tebes duni ba futuro, atu bele lori Governu ida ne'ebé de'i besik ba ema hotu no aumenta partisipasaun sosiedade tomak iha vida ekonómika, sosiál no política Paíz ne'e nian, importante katak atores hotu-hotu iha ita nia sosiedade laran, sente katak Portál Governu nian ne'e, hanesan mós sira nia Portál rasik.

Nune'e, ha'u apela, atu iha envolvimentu no kooperasaun ne'ebé sériu tebes hodi dezenvolve Portál ida ne'e, atu nune'e ita nia rain Timor-Leste bele sai dezenvolidu, demokrátiku no informadu di'ak liután!

Muitu obrigadu!

Kay Rala Xanana Gusmão

30 de Março de 2010